



**REPUBLIKA E SHQIPËRISË**  
**-AUTORITETI I KONKURRENCËS-**

**Njoftim për Shtyp**

(12 Mars 2008)

**Mbi paraqitjen në Komisionin Parlamentar të Ekonomisë dhe Financës të  
Raportit Vjetor të Autoritetit të Konkurrencës për vitin 2007**

Sot paradite kryetarja e Autoritetit të Konkurrencës, Znj. Lindita Milo(Lati) dhe antarët e Komisionit të Konkurrencës paraqiten pranë Komisionit Parlamentar të Ekonomisë dhe Financës Raportin Vjetor 2007 dhe synimet kryesore të punës për vitin 2008.

Deputetët e Komisionit të Ekonomisë shprehën vlerësimet e tyre për punën e Autoritetit të Konkurrencës gjatë vitit 2007 si një nga institucionet më të rëndësishme të krijuara për funksionimin e tregut dhe mbrojtjen e konkurrencës së lirë dhe efektive në treg.

Në fjalën e saj Znj. Milo(Lati) tha se: “Autoriteti i Konkurrencës ka arritur të mbyllë me sukses hetimet e nisura dhe të hapë një sërë hetimesh të reja në sektorë të ndryshëm të ekonomisë. Ndërhyrjet e Autoritetit të Konkurrencës për rivendosjen e konkurrencës në treg janë shtrirë në sektorë të rëndësishëm të ekonomisë si telekomunikacioni, energjia dhe tregu financiar”.

Ndër vendimet kryesore të Komisionit të Konkurrencës, kryetarja e Autoritetit veçoi vendimin “Për abuzim me pozitën dominuese në Tregun e Telefonisë së Lëvizshme të Shoqërive AMC sh.a. dhe Vodafone Albania sh.a.”. Komisioni i Konkurrencës gjobiti të dyja shoqëritë në tregun përkatës me shumën 454 185 000 lekë.

Lidhur me marrëveshjen për tregtimin e Policës Kufitare të Sigurimit, Komisioni i Konkurrencës ndaloi zbatimin e marrëveshjes dhe penalizoi me gjobë shoqëritë e sigurimit.

Gjatë vitit 2007 Komisioni i Konkurrencës vendosi ndërprerjen e menjëhershme të marrëveshjes që synonte fiksimin e çmimit të markave të ndryshme të betonit dhe monitoroi me kujdes zhvillimet në këtë treg, deri në mbylljen e hetimit. Komisioni i Konkurrencës vendosi gjobitjen e 9 kompanive prodhuese të betonit për shkak se nuk kanë dhënë informacionin e kërkuar nga Sekretariati i Autoritetit të Konkurrencës.

Autoriteti i Konkurrencës ka trajtuar marrëveshjen midis disa prodhuesve të vegjel të bukës në Qarkun e Fierit, sipas të cilës fiksohej çmimi i shitjes së bukës masive në 100 lekë dhe rritej çmimi i llojeve të tjera të bukës me rreth 17%. Për këto arsye, Komisioni i Konkurrencës, vendosi marrjen e masës së gjobës individuale ndaj kryetarit të shoqatës së prodhuesve të bukës në këtë Qark.

Viti 2007 shënon rastin e parë ku një biznes ankohet ndaj një biznesi tjetër për praktika antikonkurrese, fakt që shpreh besimin në rritje të biznesit vëndas ndaj Autoritetit të Konkurrencës si dhe përgjegjësinë e rritjes së efijçencës nga ky institucion. Ankesën e parë Autoriteti e ka marrë nga shoqëria “Nisatel”, si shoqëria e parë e liçensuar për ofrimin e shërbimit të telefonisë në zonën urbane të Vlorës, me pretendimin se Albtelekom është duke abuzuar me pozicionin e vet dominuese duke mos lidhur marrëveshjen e interkonjeksionit me “Nisatel”.

Viti 2007 është konsideruar si viti i “valës” së shit/blerjeve dhe përqëndrimit të kapitalit. Autoriteti ka studjuar dhe ka miratuar tetë raste të shit/blerjeve dhe të përqëndrimeve, kryesisht në tregun financiar (duke përfshirë tregun bankar dhe atë të sigurimeve) 5 raste dhe 3 raste në tregje të tjera.

Lidhur me synimet kryesore të punës për vitin 2008, kryetarja e Autoritetit të Konkurrencës veçoi:

--Rritja e kapaciteteve administrative

Synimi kryesor do të përqëndrohet në rritjen pavarësisë së institucionit nëpërmjet rritjes së nivelit të profesionalizimit, duke iu përafuar standardeve të Autoriteteve homologe të Konkurrencës të vendeve të Bashkimit Europian..

--Përmirësimi dhe plotësimi i kuadrit ligjor në kuadër të MSA-së

Autoriteti i Konkurrencës do të angazhohet në respektimin e detyrimeve që rrjedhin nga MSA-ja dhe do të synojë përshtetimin e procesit të integritetit legjislativ.

--Monitorimi i tregut dhe hetimi i praktikave potenciale antikonkurrese.

Gjatë vitit 2008, ndërhyrjet e Autoritetit të Konkurrencës do të shtrihen në sektorë të rëndësishëm të ekonomisë në përputhje me natyrën e ligjit “Për mbrojtjen e konkurrencës” por edhe për shkak të rolit të rëndësishëm që kanë këto sektorë për ekonominë në tërësi dhe konsumatorët në mënyrë të veçantë.

--Hetimi i përgjithshëm në sektorin e energjisë

Hetimi i përgjithshëm në sektorin e energjisë mbetet sfida kryesore e Autoritetit të Konkurrencës për vitin 2008 në drejtim të liberalizimit të sektorit të prodhimit dhe shpërndarjes së energjisë elektrike, ashtu siç dhe ka kërkuar një orientim drejt tregut të tarifave të energjisë elektrike.

Tregu i hidrokarbureve ka qenë dhe do të mbetet në axhendën kryesore të punës së Autoritetit të Konkurrencës për shkak të një konkurrence të pamjaftueshme në këtë treg, në mënyrë të veçantë në tregun e shumicës dhe për shkak të përqëndrimit të lartë që ekziston në këtë treg. Hapja e tregut për konkurrencë duke eliminuar maksimalisht sa është e mundur barrierat e hyrjes dhe monitorimi i sjelljes së operatorëve të rëndësishëm të këtij tregu përbëjnë objektivat kryesore të punës tonë të përditshme.

--Monitorimi i tregut financiar

Autoriteti i Konkurrencës po monitoron me qëllim vëzhgimin e drejtpërdrejtë jo vetëm të strukturave të tregut bankar, por duke analizuar karakteristikat e tregut sipas produkteve të ofruara nga operatorët e këtij tregu për të gjykuar nëse konkurrenca është e mjaftueshme si për produktet dhe shërbimet “retail” që ofrohen nga bankat ashtu dhe për aspekte të veçanta të ofertës së bankave për borxhin publik.

Autoriteti i Konkurrencës është në pritje të vendimit të formës së prerë të Gjykatës për të rifilluar hetimin në tregun e sigurimeve për shkak se një vendim në fuqi i Gjykatës së Shkallës së Parë në Tiranë e ka pezulluar këtë hetim. Autoriteti i Konkurrencës përfiton nga rasti të ndërgjegjësojë sistemin e drejtësisë për rëndësinë që merr ndërhyrja në kohë e Autoritetit të Konkurrencës në rivendosjen e konkurrencës në treg, pasi zgjatja me vite e proceseve gjyqësore jo vetëm zvarrit punën e Autoritetit të Konkurrencës, por edhe e nxjerr jashtë kontekstit hetimin e nisur.

--Monitorimi i sektorit të telekomunikacioneve.

Një sektor i rëndësishëm, që do të vazhdojë të jetë nën monitorimin dhe hetimin e vazhdueshëm të Autoritetit të Konkurrencës, do të jetë edhe ai i telekomunikacioneve. Konkurrentët e tregut të shërbimeve telefonike dhe internetit po rishikojnë pozicionet e tyre në kushtet e reja të krijuara në treg dhe Autoriteti i Konkurrencës do të monitorojë në vijimësi sjelljen e operatorëve të shpallur me fuqi të ndjeshme në treg, por edhe të operatorëve alternativë që tashmë do të ofrojnë shërbimin e telefonisë fikse edhe në zonat urbane.